

- प्रधानमंत्री नरेन्द्र मोदी दुनिया ऊं समस्यावां रा हल युद्ध री बजाय भगवान बुद्ध री शिक्षा मांय ढूँढबा री अपील कीनी।
- प्रदेश री सात विधानसभा सीटां माथे उपचुनाव सारू काल अधिसूचना जारी व्हेवण सागे ई नामपाना दाखिल करण रो काम सुरू व्हेला।
- जयपुर मांय काल 27 वो लोक रंग महोत्सव सुरू व्हेला।
- राज्य मांय केई ठोडां पारो उत्तरण ऊं हल्की सर्दी रो एहसास व्हेवण लाग्यो।

000

प्रधानमंत्री नरेन्द्र मोदी कह्यो है के भाषा, साहित्य, कला अर आध्यात्मिकता सरीखा सांस्कृतिक स्तंभ किण ई देश री पहचान बतावे है। वे आज नई दिल्ली मांय अंतरराष्ट्रीय अभिधम्म दिवस कार्यक्रम मांय बोल रह्या हा। प्रधानमंत्री दुनिया ऊं समस्यावां रा हल युद्ध री बजाय भगवान बुद्ध री शिक्षा मांय ढूँढबा री अपील कीनी।

प्रधानमंत्री जोर दे र कह्यो के आज देश विकास रा गेला माथे बढ़ रह्यो है अर वां री जड़ां खुद रा मान, भरोसा अर स्वाभिमान ऊं जुड़ी है। वे कह्यो के भारत अमृत काल रा बदलाव रा दौर ऊं निकळ रह्यो है अर बदलाव लावण वाळी आ यात्रा साल 2047 मांय पूरी व्हेला। वे कह्यो के ई दौर मांय देश रो उदय विकसित दश रा तौर ऊं व्हेला। प्रधानमंत्री देश रा नौजवानां ऊं विज्ञान अर प्रौद्योगिकी रा हलका मांय आगे चालता थकां संस्कृति अर मूल्यां माथे नाज़ करण बाबत् कह्यो। पाली भाषा ने शास्त्रीय भाषा रो दर्जो देवण रा बारा मांय वे कह्यो के भाषा केवल बातचीत रो ज़रियो नी है बल्कि सभ्यता अर संस्कृति री आत्मा है। वे कह्यो के पाली ने शास्त्रीय भाषा रो दर्जो देवणो भगवान बुद्ध री महान विरासत रो मान है।

000

सूचना अर प्रसारण राज्य मंत्री डॉ० एल. मुरुगन कह्यो है के जनता ताई सही सूचना अर गुणवत्ता वाळी सामग्री रो प्रसारण प्रसारकां री मोटी ज़िम्मेदारी है। डॉ. मुरुगन आज नई दिल्ली मांय इंडिया मोबाइल कांग्रेस मांय प्रसारण हलका मांय उभरता साधनां अर प्रौद्योगिकियां रा बारा मांय राख्यी ज्यी संगोष्ठी मांय बोल रह्या हा। मंत्री मुरुगन कह्यो के केन्द्रीय मंत्रिमण्डल लारला दिनां 234 शहरां मांय 730 नुवा प्राइवेट रेडियो चैनल खोलण री मंजूरी दीनी है। मंत्री मुरुगन कारोबार करण मांय आसानी बधावण सारू सिंगल विंडो प्रणाली रा प्रसारण रे ज़रिए देश मांय सामग्री उत्पादन ने बधावो देवण सारू एनीमेशन, विजुअल एफेक्ट्स, गेमिंग अर कॉमिक्स हलका माथे खास ध्यान देवण बाबत् कह्यो। ई मौके सूचना अर प्रसारण सचिव संजय जाजू प्रसारण हलका मांय नियामक नवाचार रा खास काम रो जिक करता थकां प्रसार भारती री डायरेक्ट टू मोबाइल-डीटूएम प्रसारण पहल रा बारा मांय ई जाणकारी दीनी।

000000

प्रदेश रा सात विधानसभा हलकां झुंझुनू, देवली-उनियारा, खींवसर, दौसा, चौरासी, रामगढ़ अर सलूंबर मांय 13 नवंबर ने व्हेवण वाळा उप-चुनाव सारू काल अधिसूचना जारी करी जावेला। ई सागे ई नामपाना दाखिल करण रो काम सुरू व्हे जावेला। उम्मीदवार 25 अक्टूबर ताई पर्चा दाखिल कर सकेला। पर्चा री जांच 28 अक्टूबर ने करी जावेला। उम्मीदवार 30 अक्टूबर ताई नाम पाछा ले सकेला। उप चुनाव व्हेला। उपचुनाव सारू पड़बा वाळा वोटों री 23 नवंबर ने गिणती व्हेला। मुख्य निर्वाचन अधिकारी नवीन महाजन बतायो के आं हलकां मांय व्हेवण वाळा विधानसभा उपचुनाव मांय 19 लाख 36 हजार ऊं बत्ता मतदाता वोट देवण रो हक इस्तेमाल करेला। मुख्य निर्वाचन अधिकारी बतायो के ई सारू आं 7 विधानसभा हलकां मांय 1 हजार 862 मतदान केंद्र अर 53 सहायक मतदान केंद्र बणाया जावेला। वे बतायो के चुनाव लड़बा वाळा सगळा उम्मीदवारां अर सियासी पार्टियां ने वां री बेबसाइट, टीवी चैनल्स, राष्ट्रीय अर स्थानीय अखबारां मांय उम्मीदवार रो आपराधिक रिकॉर्ड व्हेवण रा हालात मांय कम ऊं कम तीन दफा इण री जाणकारी देवणी व्हेला। झुंझुनू विधानसभा हलका मांय व्हेवण वाळा उप-चुनाव ने ध्यान राखता थकां ज़िला कलेक्टर अर एस.पी मतदान केंद्र रो दौरो कर र व्यवस्थावां रो जायजो लीनो अर जरूरी हुकम दीना। अलवर रा जिला निर्वाचन अधिकारी रामगढ़ विधानसभा हलका मांय उप-चुनाव सारू करी जा रही तैयारियां रो जायजो लेवण रे दौरान

चेक पोस्टां रो दौरा कीनी। ई बीच अजमेर मांय 18 साल या बत्ती उम्र रा विद्यार्थियां रा नाम वोटर लिस्टां मांय जोड़बा सारू स्कूलां मांय आज खास शिविर लगायी ज्या। शिविरां मांय 18 साल री उम्र पूरी कर चुक्या विद्यार्थियां रा नाम वोटर लिस्टां मांय जोड़ी ज्या, जदके 17 साल ऊं बत्ती उम्र रा विद्यार्थियां रा संबंधित कागजात जमा करी ज्या, ताकि आगला चुनाव मांय वोट देवण सारू वां रा नाम जोड़या जा सके।

00000

राष्ट्रपति द्रौपदी मुर्मू, उपराष्ट्रपति जगदीप धनखड़ अर प्रधानमंत्री नरेन्द्र मोदी महर्षि वाल्मिकी जयंती रे मौके जनता ने शुभकामनावां दीनी है। सोशल मीडिया पोस्ट रे जरिये राष्ट्रपति कह्यो के महर्षि वाल्मिकी कानी ऊं रची ज्यी रामायण, भगवान राम री गाथा सागे मानव समाज ने दियो ज्यो अनमोल तोहफो है। उपराष्ट्रपति जगदीप धनखड़ कह्यो के महर्षि वाल्मिकी रो ज्ञान, करुणा, सांच अर धर्म रो संदेश सगळां सारू है। प्रधानमंत्री नरेन्द्र मोदी कह्यो के महर्षि वाल्मिकी सकारात्मक सोच माथे जोर देता थकां सेवा अर इन्सानियत रा मान ने महत्त्व दीनो। प्रदेश मांय ई वाल्मिकी जयंती रे मौके न्यारा-न्यारा कार्यक्रम राख्या जा रह्या है। पाली मांय बांडी नदी रे किनारे वाल्मिकी समाज भवन मांय भजन संध्या राखी जा रही है। भरतपुर मांय वाल्मिकी जयंती रे मौके केई ठोड़ा भण्डारा लगायी ज्या अर वाल्मिकी समाज री ओर ऊं कला मन्दिर ऊं महर्षि वाल्मिकी री शोभायात्रा निकाळी ज्यी। हनुमानगढ़ मांय ई लंगर भंडारा लगायी ज्या।

000

जयपुर रा जवाहर कला केन्द्र मांय काल 27वां लोकरंग महोत्सव सुरू व्हेला। 28 अक्टूबर ताई चालण वाळा ई महोत्सव रा तैत राष्ट्रीय लोक नृत्य समारोह राख्यो जावेला अर राष्ट्रीय हस्तशिल्प मेळो लगायो जावेला। इण मांय 24 राज्यां रा करीब 4 हजार कलाकार सिरकत करेला। शिल्पग्राम मांय संवारे 11 ऊं रात 10 बज्यां ताई चालण वाळा राष्ट्रीय हस्तशिल्प मेळा मांय ग्रामीण गैर कृषि विकास अभिकरण (रूडा) री मदद ऊं नामी दस्तकारां रा हाथ री कारीगरी ऊं बणायी ज्या 100 ऊं बत्ती भांत रा सामान री स्टॉल्स लगायी जावेला।

000

जयपुर मांय काल जयपुर दिवस समारोह सुरू व्हेला। ई रा तैत जयपुर नगर निगम हेरिटेज री ओर ऊं एक महीना ताई रोजीना भांत-भांत रा कार्यक्रम राख्या जावेला। जयपुर नगर निगम हेरिटेज री महापौर कुसुम यादव बतायो के जयपुर स्थापना दिवस रा जळसा री सुरुआत संवारे मोती डूंगरी गणेश मंदिर मांय पूजन सागे व्हेला। यादव बतायो के जयपुर दिवस समारोह मांय राजस्थानी रीति-रिवाज अर संस्कृति ऊं जुड़या राजस्थानी कार्यक्रम, सूफी कार्यक्रम, हेरिटेज वॉक, कथक नृत्य अर बॉक्स क्रिकेट रा आयोजन राख्या जावेला। महापौर बतायो के 21 अक्टूबर ने जल महल री पाल माथे सांस्कृतिक कार्यक्रम राख्या जावेला। 22 अक्टूबर ने बड़ी चौपड़ माथे कव्वाली रो कार्यक्रम व्हेला। ई सागे ई हिन्दी फिल्मां ऊं जुड़यो कार्यक्रम, भजन संध्या अर कवि सम्मेलन रा कार्यक्रम ई राख्या जावेला।

000

स्कूल शिक्षा, उच्च शिक्षा अर तकनीकी विभाग री ओर ऊं जयपुर मांय 6 नवंबर ने राइजिंग राजस्थान प्री-समिट राखी जावेला। राजस्थान स्कूल शिक्षा परिषद रा राज्य परियोजना निदेशक अविचल चतुर्वेदी री सदरत मांय प्री-समिट री तैयारियां रा बारा मांय राखी ज्यी मीटिंग मांय अहलकारां ने तालमेल सागे काम करण रा हुकम दिया ज्या। ई बीच प्रदेश मांय निवेशकां ने बुलावण सारू राखी जावण वाळी राइजिंग इन्वेस्टमेंट समिट रा तैत जिला स्तर माथे ई समिट राखी जा रही है। बालोतरा मांय राखी ज्यी समिट मांय कैबिनेट मंत्री जोराराम कुमावत री मौजूदगी मांय रिसोर्ट, पर्यटन, कृषि प्रसंस्करण, होटल अर टेक्सटाइल कारोबारियां सागे 2 हजार 200 करोड़ रुपया मोल रा 100 करार माथे सही करी ज्यी।

000

राज्यपाल हरिभाऊ बागडे कॉर्पोरेट जगत ऊं सामाजिक ज़िम्मेदारी समझता थकां देश रा लगातार विकास मांय योगदान करण बाबत कह्यो है। वे नई दिल्ली मांय राखी ज्यी **“इण्डिया सीएसआर एण्ड ईएसजी समिट 2024”** मांय बोल रह्या हा। राज्यपाल कह्यो के **“विकसित भारत 2047”** रो लक्ष्य देश ने माली ताकत बणावण सागे ई सामाजिक तौर ऊं मजबूत बणा र सगळां रा विकास सारू काम करणो है। वे कॉर्पोरेट सोशल रिस्पॉन्सिबिलिटी रा तैत कुदरती तरीका ऊं खेती मांय ई मदद करण री अपील कीनी। राज्यपाल बागडे सीएसआर रा तैत किसानां ने देशी बीज रे जरिये बिना रसायन खेती करण अर कम पाणी ऊं बत्ती उपज लेवण री सिखावण देवण बाबत ई कह्यो।

00000

दृष्टिबाधित लोगों सारू 32वीं अखिल भारतीय संगीत होड़ काल जयपुर मांय सरू व्हेला। अनुराग संगीत संस्थान री ओर ऊं राखी जा रही ई होड़ मांय देशभर ऊं अढाई सौ दृष्टिबाधित कलाकार सिरकत करेला। होड़ रो फाइनल राउंड 20 अक्टूबर ने व्हेला।

000

प्रदेश मांय घणखर ठोड़ां पारा मांय उतार-चढ़ाव रो दौर चाल रह्यो है। रात री बगत पारो उतरण ऊं केई ठोड़ां हल्की सदीं रो अहसास व्हेवण लाग्यो है। बीती रात सीकर, चित्तौड़गढ़, डबोक, चूरू अर संगरिया मांय पारो 20 डिग्री सेल्सियस ऊं नीचे दर्ज करी ज्यो। दूजी कानी केई जिलां मांय हाल ई तापमान सामान्य ऊं दो ऊं तीन डिग्री सेल्सियस बत्तो दर्ज कर्यो जा रह्यो है। लारला 24 घंटा मांय दिन री बगत तापमान मांय मामूली बधोतरी दर्ज करी ज्यी। ई बीचे बीकानेर मांय कठे-कठे आज हल्की बारिश व्ही। मौसम केंद्र जयपुर रे मुजब प्रदेश मांय आवता चार दिन मौसम साफ रेहवण सागे पारा मांय उतार-चढ़ाव रो दौर चालतो रेहवण रा आसार है।

00000

जोधपुर मांय 21 ऊं 27 अक्टूबर ताई संभाग स्तर रो अमृता हाट मेळो लगायो जावेला। इण मांय गांवाई हलकां री महिलावां कानी ऊं घर मांय बणायी ज्या सामान, खाण-पीण री सामग्री अर दूजा सामान बिक्री सारू मुहैया कराया जावेला। महिला अधिकारिता विभाग रा उपनिदेशक फरसाराम बिश्नोई बतायो के संभाग स्तर री अमृता हाट मांय जोधपुर जिला समेत न्यारा-न्यारा जिलां रा खुद सेवक समूहां कानी ऊं करीब 80 स्टॉल्स लगाई जावेला।

00000

चित्तौड़गढ़ मांय बेघर लोगों सारू खास अभियान चलायी ज्यो है। ई रा तैत जिला कलेक्टर आलोक रंजन कलेक्ट्रेट परिसर ऊं रथां ने हरी झंडी बता र रवाना कीना। सामाजिक न्याय अर अधिकारिता विभाग अर एक खुद सेवक संस्थान री मदद ऊं दो दिन रो ओ खास अभियान चलायी ज्यो है।

झालावाड़ मांय ई सामाजिक न्याय अर अधिकारिता विभाग अर भरतपुर री एक गैर सरकारी संस्था री ओर ऊं ऐडो अभियान चलायी ज्यो है। जिला कलेक्टर अजय सिंह राठौड़ मिनी सचिवालय ऊं दो एम्बुलेंस ने हरी झण्डी बता र रवाना कीनी।

000000